



Republika e Kosovës
Republika Kosovo - Republic of Kosovo
Kuvendi - Skupština - Assembly

T R A N S K R I P T

**I MBLEDHJES SOLEMNE ME RASTIN 6-VJETORIT TË PAVARËSISË
SË KOSOVËS, E MBAJTUR MË 17 SHKURT 2014**

**SVEÇANE SEDNICE POVODOM VI-GODIŠNJE NEZAVISNOSTI
KOSOVA, ODRŽANE 17. FEBRUARA 2014. GODINE**

**SHKURT - FEBRUAR
2014**

Mbledhjen e drejtoi kryetari i Kuvendit, z. Jakup Krasniqi.

KRYETARI: E nderuara presidente e Republikës së Kosovës, zonja Atifete Jahjaga,
I nderuar kryeministër, zoti Hashim Thaçi,
Të nderuar ambasadorë dhe përfaqësues diplomatikë në Kosovë,
Të nderuar kolegë deputetë,
Të nderuara familje të dëshmorëve,
Të nderuar miq dhe mysafirë,
Të nderuar qytetarë të Kosovës,
Zonja dhe zotërinj,
Në hapje të kësaj seance solemne të Kuvendit, për nder të përvjetorit të gjashtë të shpalljes së pavarësisë së Republikës së Kosovës, më lejoni t'ju drejtohem me disa fjalë rasti.

Data e 17 shkurtit 2008 do të mbetet përjetësisht në historinë e Kosovës si kurorë e përpjekjeve shekullore të popullit tonë për liri, pavarësi, demokraci dhe dinjitet njerëzor. Shpallja e pavarësisë ishte akt historik, por të cilit i ka paraprirë një proces i gjatë çlirimtar, i mbuluar me lavdi, me gjak e sakrifica të panumërta, i ka paraprirë një luftë titanike për jetë a vdekje, që simbolizohet me emrin emblemë të komandantit legjendar të Ushtrisë Çlirimtare të Kosovës, Adem Jashari.

Sot Kosova përulet me pietet para kujtimit dhe veprave të pashlyeshme të brezave të tërë që u shkrinë për atdheun e tyre, për lirinë dhe përparimin e tij.

Drejtësia e çështjes së Kosovës, mbrojtja e vlerave demokratike botërore dhe e të drejtave njerëzore e bëri një forcë të bashkuar të miqve tanë, në krye me Shtetet e Bashkuara të Amerikës, të Bashkimit Evropian e të NATO-s, e cila iu gjet përkrah Kosovës së sflitur në çastet më të rënda historike.

Në këtë ditë solemne, ne u drejtojmë atyre mirënjohjen tonë të thellë, bashkë me zotimin e vendosur për miqësinë dhe bashkëpunimin tonë të përkushtuar. Gjashtë vjet të pavarësisë, Kosovën e kanë konfirmuar si vend i transformimeve dhe zhvillimit, si atdhe të qytetarëve të barabartë, si faktor kredibil paqendërtues dhe bashkëpunues me demokracitë përreth dhe kudo në botë. Kosova e pavarur për gjashtë vjet rresht nuk e ka rrezikuar as dëmtuar askënd, sepse ajo si projekt dhe realitet është mbështetur dhe themeluar mbi vlerat e larta të demokracisë moderne amerikane dhe europerëndimore. Në Kosovë është vendosur rend kushtetues që bazohet në parimet e lirisë, paqes e demokracisë.

Zonja dhe zotërinj

Republika jonë e re e ka moshën e një fëmije që sapo e fillon shkollën dhe mësimin. Para saj shpërfaqet në horizontin e kaltër e ardhmja plot sfida, por e sigurt. Ne kemi nevojë të mësojmë nga shembujt e mirë, por edhe të këqij të tjerëve, kemi nevojë të mësojmë të kaluarën për të mos na u përsëritur historia, as si farsë, as si tragjedi. Kemi nevojë ta mbajmë gjallë amanetin e themeluesve të pavarësisë së Kosovës, për lirinë, për nderin dhe begatinë e vendit e popullit që përfaqësojmë.

Vendi ynë ka hyrë tashmë në projektin e madh dhe historik të integritimeve euroatlantike. Përcaktimi i popullit të Kosovës për vlerat evropiane dhe euroatlantike është baza dhe garancia e këtij projekti. Procesi reformues, shpeshherë me dhembje dhe kosto të lartë, lufta e pakompromis kundër krimit e korrupsionit dhe sigurimi i sundimit të ligjit e rendit, ngritja ekonomike dhe luftimi i varfërisë e papunësisë janë pa dyshim sfidat më të rënda të Kosovës në rrugën drejt së ardhmes së aspiruar.

Zonja dhe zotërinj,

Kosova do t'u qëndrojë besnike vlerave mbi të cilat është themeluar si shtet dhe demokraci, do t'i qëndrojë besnike vetvetes, por edhe miqve të saj, duke qenë në partneritet të plotë me ta në synimin për një shoqëri dhe shtet modern, demokratik e paqësor, të anëtarësuar në OKB e në organizma tjerë ndërkombëtarë.

Të nderuar deputetë,

Të nderuar qytetarë,

Urime Pavarësia! Faleminderit për vëmendjen!

KRYESUESI: E ftoj kryeministrin e Republikës së Kosovës, zotin Hashim Thaçi, për fjalë rasti.

KRYEMINISTRI HASHIM THAÇI:

Faleminderit i nderuar kryesues Haliti!

E nderuara presidente e Republikës së Kosovës, zonja Jahjaga,

I nderuar kryetar i Kuvendit të Kosovës, z. Krasniqi,

Të nderuar deputetë të Kuvendit të Kosovës,

Të nderuar ambasadorë dhe mysafirë të pranishëm,

Të nderuar qytetarë të Kosovës;

Zonja dhe zotërinj;

Jemi mbledhur sot këtu së bashku për ta festuar ditëlindjen e Kosovës, ditëlindjen e shtetit tonë, dhe unë dëshiroj t'ju përcjell juve dhe çdo qytetari të Kosovës urimet më të përzemërta për përvjetorin e gjashtë të pavarësisë.

Po në këtë sallë, gjashtë vjet më parë ne bashkërisht i kemi finalizuar aspiratat dhe përpjekjet e shumë gjeneratave që na kanë paraprirë në rrugën tonë të gjatë të lirisë dhe pavarësisë.

Ne i kemi vënë në jetë ëndrrat e një populli të tërë për liri, duke finalizuar një luftë të gjatë e të mundimshme për pavarësi.

Prandaj, sot e kujtojmë me respekt të madh luftën e Ushtrisë Çlirimtare të Kosovës, e kujtojmë dhe respektojmë sakrificën e të gjithë qytetarëve të Kosovës për liri. Kudo që ishin, në Kosovë e Diasporë. E kujtojmë punën e vazhdueshme të presidentit Rugova, e respektojmë heroizmin e pashoq të komandantit legjendar Adem Jashari, të komandantit Zahir Pajaziti, Shkëlzen e Luan Haradinaj, Fehmi dhe Xhevë Lladrovci, Agim Ramadani, Sali Çekut, Ilaz Kodra dhe shumë e shumë heronjve tjerë që e vulosën lirinë dhe pavarësinë e Kosovës.

Në këtë ditë të shenjtë, unë bashkë me ju dhe të gjithë qytetarët e Kosovës shprehim nderimet dhe mirënjohjen më të lartë, përkulemi me nder përpara veprës së dëshmorëve që e dhanë jetën për t'i mundësuar këto ditë të lirisë e pavarësisë që gëzojmë sot.

Kjo është pa dyshim një ditë gëzimi dhe lumturie për ne.

Por, gjatë festimit të pavarësisë ne ndiejmë dhimbjen gjithashtu në zemrat tona për motrat e vëllezërit tanë të rënë apo të zhdukur që kanë punuar për këtë realitet të sotshëm që po jetojmë, por fatkeqësisht nuk janë në mesin tonë.

Mirëpo, ne kemi dëshmuar se dimë ta kthejmë dhimbjen në forcë.

Nuk jemi zhytur në depresion prej pikëllimit, por kemi ditur të ngrihemi në këmbë e t'i marrim vetë në duar fatet e vendit tonë.

Përfitoj gjithashtu nga ky rast për ta shprehur mirënjohjen e thellë si kryeministër i Republikës së Kosovës dhe në emër të qytetarëve të Kosovës dua t'i falënderoj Shtetet e Bashkuara të Amerikës, Mbretërinë e Bashkuar, Gjermaninë, Francën, Italinë dhe të gjitha shtetet aleate perëndimore, të cilat besuan në kauzën tonë të drejtë dhe na ndihmuan për ta siguruar lirinë e pavarësinë.

Një mirënjohje dhe falënderim shkon për shtetin shqiptar, për kontributin e jashtëzakonshëm për lirinë dhe pavarësinë e Kosovës.

Unë edhe sot dua t'i siguroj aleatët tanë se në Kosovë e kanë gjetur një mik mirënjohës dhe një besnikëri të përhershme e të pakushtëzuar. Ju faleminderit shumë!

Faleminderit për Shtetet e Bashkuara të Amerikës për vendet e Bashkimit Evropian dhe NATO-s.

Të nderuar pjesëmarrës,

15 vjet liri e 6 vjet pavarësi nuk janë shumë për historinë e një popullit, por ne gjithsesi kemi bërë shumë. Kemi bërë shumë, sepse kemi punuar bashkërisht.

Në një kohë rekord ne i ndërtuam nga zero institucionet shtetërore, organet e sigurisë dhe të drejtësisë dhe shërbimin diplomatik.

Mandej me një proces të ndjeshëm të dialogut me ndërmjetësimin e Bashkimit Evropian dhe përkrahjen e fuqishme të Shteteve të Bashkuara të Amerikës arritëm marrëveshjen e parë historike për normalizimin e marrëdhënieve ndërmjet shtetit të Kosovës dhe Serbisë.

Nëpërmjet kësaj marrëveshjeje, ne arritëm ta sigurojmë respektimin e plotë të sovranitetit tonë shtetëror, rendit kushtetues dhe ligjeve tona në gjithë territorin e Kosovës.

Si rezultat, kemi zhbërë strukturat ilegale në veri të vendit, kemi filluar procesin e integritetit në institucionet legale të Kosovës, kemi mbajtur zgjedhjet e para lokale

demokratike në tërë territorin e vendit dhe i kemi dhënë fund anarkisë atje duke e shtrirë sundimin e rendit dhe ligjit.

Ne të gjithë duhet të ndihemi krenarë, sepse sfidat me të cilat është përballur vendi ynë kanë qenë të jashtëzakonshme dhe të pakrahasueshme.

Të nderuar deputetë,
Qytetarë të Kosovës,
Vizioni i Kosovës së pavarur është ai i një shteti demokratik dhe të zhvilluar,

Një Kosovë që është e bashkuar pavarësisht prej ndasive të opinionit, bindjeve të përkatësisë etnike apo fetare.

Një Kosovë që është e gatshme ta gjejë vendin që i takon në familjen e shteteve të lira të botës, që jeton në paqe me të gjithë fqinjët e saj dhe që përmbush me përgjegjshmëri obligimet ligjore dhe morale në arenën ndërkombëtare.

Ne duhet të vazhdojmë të punojmë për ta ndërtuar një Kosovë ku puna, iniciativa individuale, talenti, kreativiteti, këmbëngulja e çdo individi respektohet dhe shpërblehet.

Një Kosovë ku sundon ligji, ku mbrohet prona private e kontratat, ku inkurajohen iniciativat private dhe garantohet konkurrenca e lirë dhe mundësitë e barabarta.

Një vend ku shtresat sociale trajtohen me dinjitet, në mënyrë që asnjë të mos ngelet jashtë përfitimeve që vijnë prej progresit dhe zhvillimit të shoqërisë sonë.

Një Kosovë ku çdo qytetar mund të jetojë me dinjitet, respekt për vetveten, me shpresë e mirëqenie.

Ne që kemi jetuar për dekada të tëra në robëri, e dimë sa e shtrenjtë është liria, prandaj do të bëjmë çmos që të punojmë që çdo kosovar i thjeshtë ta gëzojë maksimumin e lirive individuale në çdo fushë.

Pasi e fituam lirinë politike, do të punojmë pa pushim për rritjen e lirisë ekonomike, për garantimin e të gjitha lirive dhe të drejtave të njeriut, si dhe zbatimin shembullor të të drejtave të pakicave.

Ne kemi bërë shumë përpjekje për ta përkthyer këtë vizion në realitet nëpërmjet nismave legislative, reformave, politikave apo programeve të ndryshme qeveritare dhe sot mund të themi se jemi duke ecur në drejtimin e drejtë.

Ne të gjithë duhet të kontribuojmë për shtëpinë tonë dhe mënyrën se si ajo shihet në botë.

Përmirësimi i imazhit të vendit tonë është vendimtar, jo vetëm për përpjekjet tona diplomatike për ta futur Kosovën në NATO, Bashkim Evropian dhe Organizatën e Kombeve të Bashkuara, por edhe për zhvillimin ekonomik.

Duhet t'i tregojmë mbarë botës se Kosova i ka akomoduar plotësisht sipas standardeve më të larta të gjitha komunitetet pakicë që jetojnë këtu, e në veçanti komunitetin serb, duke garantuar stabilitetin e brendshëm të vendit dhe kemi arritur marrëveshjen për normalizimin e marrëdhënieve tona me Serbinë.

Të nderuar deputetë,
Qytetarë të Republikës së Kosovës,
Mysafirë të pranishëm,
Pas zgjedhjeve dinjitoze lokale të vitit të shkuar, ne po dëshmojmë se demokracia jonë funksionon në mënyrë normale.

Kjo dëshmon se ne e kemi merituar besimin e dhënë nga partnerët tanë ndërkombëtarë.

Më lejoni ta mbyll duke ju thënë se shumë sfida të mëdha ende ngelen para nesh dhe ne të gjithë së bashku duhet të jemi të përgatitur për t'i bërë përpjekjet dhe sakrificat e duhura për t'i kaluar ato.

Megjithatë, unë jam i bindur se ne do t'i kapërcejmë këto sfida, pasi kemi dëshmuar se kemi kapërcyer sfida edhe më të mëdha në një të kaluar jo edhe aq të largët.

Të nderuar deputetë,
Të nderuar mysafirë,
Të nderuar qytetarë të Republikës së Kosovës,
Bashkëqytetarë të mi, kudo që jetoni,
Gëzuar Ditën e Pavarësisë dhe zoti e bekoftë Kosovën dhe qytetarët e saj!
Ju faleminderit!
Urime dhe suksese!

KRYETARI: Zonja dhe zotërinj të pranishëm,
Ju falënderoj për pjesëmarrjen dhe me kaq i përmbyllem punimet e kësaj seance solemne.

Mirupafshim!

*E përgatiti:
Njësia për Transkriptim dhe Lekturë*